

Noticia  
Transparente  
di Gobierno

# ISLA ONLINE

Diabierna 3 Mei 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952



ARTE DI MURAYA  
SAN NICOLAS



STABILIDAD  
Y  
PROSPERIDAD

2 0 2 4



Gabinete Wever-Croes





## GABINETE WEVER-CROES LO SIGUI TRAHA DI CERCA CU INSTITUTONAN ENCARGA CU PROTECCION DI NOS MUCHANAN




Diahuebs mainta, Prome Minister Evelyn Wever-Croes tabata tin un reunion na Bureau Sostenemi cu diferente actor den e cadena di proteccion di nos muchanan, ora ta trata di abuso sexual di menor.

Presente durante e reunion tabata señora Magaly Maduro cu ta directora di Bureau Sostenemi, señora Janine Rodriguez di slachtofferhulp, y señora Lisette Gomez cu ta e persona encarga cu e comision nacional ora ta trata abuso sexual di muchanan.

Prome Minister a indica cu e topico di e mainta aki tabata e proceduranan. Durante e reunion a papia di con e proceduranan ta ancra den otro y unda por bin mehoracion pa por logra e meta di proteha nos muchanan.

Manera ta conoci, luna pasa a wordo decreta como Luna Nacional di Conscientisacion Contra Abuso di Mucha, na unda a enfoca riba conscientisa pueblo en general riba e topico importante aki, y riba e castigonan cu a wordo aumenta caba desde aña 2020. Durante e luna aki tambe, a enfoca riba e riesgo cu e muchanan chikito ta core, mirando cu hopi biaha ta esnan cu ta mas cerca di e mucha, ta e abusado.

“Esaki ta un topico cu mi ta carga hopi cerca di mi curason. Gabinete Wever-Croes ta comprometi pa sigui traha di cerca cu e institucionnan aki pa asina sigura proteccion di nos muchanan. Gobierno ta actualmente enfocando riba e procesonan den Gobierno, pa sigura cu tur keho cu wordo entrega, ta wordo atendi debidamente”, Prome Minister a duna di conoce. 





Durante presentacion di e relato annual 2023

PROME MINISTER A DUNA UN RESUMEN DI E TRABOUNAN DI SU MINISTERIO DI ASUNTONAN GENERAL



Durante Conferencia di Prensa di Gobierno di Aruba diahuebs mainta, 2 di mei, Prome Minister Evelyn Wever-Croes a presenta e Relato Anual 2023 di su ministerio di Asuntonan General, Innovacion, Organizacion Gubernamental, Infraestructura y Planificacion Teritorial.

Na inicio di e conferencia Prome Minister a elabora riba e prome capitulo di e relato cual ta di Asuntonan General (Algemene Zaken). E mandatario a menciona cu e capitulo aki ta casi mita di ful e relato y aki en corto e ta informa riba cada paragraf di capitulo 1, Algemene Zaken:

Analisis di e acuerdo di Gobernacion, Reformanan y Landspakket:

E relato ta indica con leu ta cu e ehecucion di e puntonan aki den e ministerio.

Relacion den Reino y Relacion Exterior:

Esaki ta un parti hopi importante di e ministerio y entre otro ta informa riba reunionnan y encuentronan.

SDG Commissie (Sustainable Development Goals):

Akiden tin e Gender Stuurgroep pa Igualdad di Genero y aki ta splica kico tur a haci specialmente pa loke ta trata e comision cu a institui contra abuso di hende muhe.

Seguridad Nacional/Staatsveiligheid:

Informacion cybersecurity y veiligheidsdienst entre otro.

Veiligheidshuis:

Esaki ta un plataforma unda diferente departamento y instituto ta bin hunto pa trata e temanan y problematicanan social mas severo unda tin dobel of tripel complicacion.

Calamidadnan:

Crisis Management Office (CMO)

Crisis Migratorio di Venezuela y e impacto riba Aruba

Ombudsman:

Tin un comision independiente trahando pa recruta e ombudsman. Esaki lo keda cla pronto y lo manda e 3 nombrenan pa Parlamento tuma e decision.



Bijzondere Commissies:

Commissie Versterking Democratisch Bestel;

Pa fortifica nos fundeshi democratico. Desde cu Gabinete Wever-Croes a sinta a cuminsa traha pa independisa e colegionan halto di estado; Algemene Rekenkamer, Raad van Advies y Parlamento. Independisando esakinan ta sigura checks and balances y niun gobierno den futuro por kibra nan of stroba nan. Ya a logra e independisacion di Raad van Advies y den e relato ta detaya con leu ta cu Algemene Rekenkamer y Parlamento.

ActieComité Hondenverordening;

A wordo institui na aña 2019 pa Minister President Evelyn Wever-Croes. Entre otro a bin campañanan di sterilisacion y conscientisacion pa doñonan di cacho

Comision Inclusion;

Comision di inclusion di personanan cu necesidad especial

Comision Amenities;

Ta trahando riba mantencion y renobacion di nos Patrimonionan Historico, Natural y Cultural.

Kosten Bureau Minister President:

Aki e relato anual ta duna splicacion di tur loke ta e gastonan di salarionan y cantidad di trahadonan den e ministerio di Asuntonan General. Ta menciona cu na 2017, cu ta e ultimo aña di Gabinete Eman, Mike Eman tawatin den su ministerio un total di 147 persona riba payroll, sumando 11.323.300fl na salario. Prome Minister actual na aña 2023 tawatin solamente 23 empleado den su ministerio pa un total di 2.521.184fl na gasto di salario, reflehando e diferencia di -8.8fl miyon compara cu Eman.

Capitulo 1, di e relato anual ta finalisa cu un splicacion amplio di e “dienstreizen” mustrandó detayadamente cada biahe di trabou cu ministerio di Asunto General a haci den exterior.

Pa por lesa y download e Relato Anual 2023 por bishita e Plataforma di Facebook di Gabinete Wever-Croes. Tambe por via pagina online di BUVO of via e link:

[https://issuu.com/gabinetewevercroesaruba/docs/jaarverslag\\_algemene\\_zaken\\_2023](https://issuu.com/gabinetewevercroesaruba/docs/jaarverslag_algemene_zaken_2023)





MINISTER

*Ursell Arends*

## MINISTER ARENDS TA ELOGIA WORKSHOP DI DIRECTIE OUDERENZAKEN PA CASNAN DI CUIDO



Durante un encuentro na Cas di Cultura riba diahuebs 2 di mei 2024, Directie Ouderenzaken a organisa un workshop di nutricion y movecion pa adultonan mayor, dirigi especificamente na casnan di cuidu. E evento a brinda e personal di casnan di cuidu informacion pa mehora e bienestar di nan cliente.

Oradornan di Healthy Lifestyle Center, Fundacion Movimento ta Bida y koki local a elabora ariba cambianan chikito cu por tin un impacto grandi ariba nos salud. Chef Moisés Ramirez a duna sugerencianan pa un dieta mas saludabel, entre otro, evita come fruta pa desayuno y introduci awa cu infusion di fruta of menta pa asina encurasha hidratacion.

Isabel Struve y Lyanne Maduro di Healthy Lifestyle Center a enfatisa e importancia di haci cuminda saludabel atractivo. Nan a ofrece adaptacionnan practico pa textura di cuminda pa acomoda adultonan mayor cu ta perde forza den boca, manera berdura gesteam. Tambe a recomenda pa cumpra berdura di freezer cual ainda ta nutritivo y ta wanta pa un periodo mas

largo. Healthy Lifestyle Center a termina nan presentacion dunando un splicacion con pa lesa etiket di cuminda, pa wak e porcentahe di sodium, esta salo, y sucu cu ta den e producto.

Fundacion Movimento ta Bida a enfoca ariba e rol critico di actividad fisico na cualkier edad. Nan a haci un demostracion di ehercicio accesibel cu por haci hunto cu adulto mayor, pa esnan ariba pia como tambe esnan cu problemanan di movilidad. Ehercicio fisico diario ta vital pa mantene forza y yuda cu salud mental. Nan tips practico pa integra ehercicio mental den rutina diario door di, entro otro, crucigrama, y otro weganan cu ta rekeri pa pensa.

Minister Arends ta felicita Keila Helder y Giannina Angela hunto cu Directie Ouderenzaken pa nan ehecucion excepcional den promove bida saludabel pa nos adultonan mayor. E workshop no solamente a informa pero tambe a inspira un cambio positivo cerca tur esnan presente. ■■■





**Gobierno di Aruba a decreta año 2024  
como Año di Stabilidad y Prosperidad.**

**Esakinanan ta fundeshi cu e  
generacionnan Arubiano prome cu nos  
a bin ta preparando pa nos generacion.**

**Despues di e pandemia global di  
COVID-19, nacionnan rond mundo a  
encontra retonan sin precedente cu a  
pone nan resiliencia y adaptabilidad na  
prueba. Aruba, un perla den Caribe, a  
sali di e periodo dificil no solamente  
mas fuerte, pero tambe cu un vision y  
compromiso renoba pa  
Stabilidad y Prosperidad.**





## Minister di Cultura Xiomara Maduro riba Dia di Rey: **ARUBA CU BUNITA CEREMONIA NA DUNA HONOR DI REY WILLEM ALEXANDER**

Diasabra ultimo dia 27 di april a celebra Dia di Rey na ocasion di e fecha natalicio di Su Mahestad Rey Willem Alexander. Gobierno di Aruba pa medio di Comision Celebracion Dianan Nacional a prepara un bunita programa pa e celebracion aki. Manera ta custumber Comision Copa Hubenil Gobernador Felipe B. Tromp a entrega e Premio Copa Gobernador Felipe B. Tromp.

E mainta a inicia cu Minister di Finansa y Cultura Sra. Xiomara Maduro hunto cu Comision di Recepcion a ricibi Su Excelencia Gobernador Juan Alfonso Boekhoudt y su distinguido esposa na nan yegada na Parke Wilhelmina. Despues cu su Excelencia a haci inspeccion di e Cuerpo di Marina Real y saluda e Guardia di Honor di Gruponan Hubenil uniforma, e ceremonia oficial a inicia cu presentacion di Himno di Aruba y Himno di Hulanda, cualnan a wordo acompaña musicalmente pa Cuerpo di Marina Real.

Despues Maestra di Ceremonia Lorene Flores a yama bon bini na su Excelencia Gobernador Sr. Juan Alfonso Boekhoudt y su distinguido esposa; Su Honorabel Presidente di Parlamento Sr. mr. Edgard Giovanni Andres Vrolijk; Su Excelencia Prome Minister di Aruba, Sra. mr. Evelyn Christina Wever-Croes y su distinguido esposo; su Excelencia Minister di Finansa y Cultura, Sra mr. Xiomara Jeanira Maduro; Miembronan di Parlamento; Miembronan di Consejo di Minister; Miembronan di Cuerpo Consular; Miembronan di Comision Copa Hubenil Gobernador Felipe B. Tromp; Miembronan di Comision Celebracion Dianan Nacional, Miembronan di Cuerpo di Marina Real y demas invitado, a continua cu e ceremonia di acto protocolar.

Presidente di Parlamento mr. Edgard Vrolijk a hiba palabra den nomber di comunidad di Aruba y a expresa felicitacion na Su Mahestad. A sigui cu e presentacion di "Grupo di baile "Kids & Youth in Action" bou direccion di sra. Deborah Boekhoudt cu a presenta dos baile, e prome titula "Hand in Hand" y e di dos un baile titula "Daba Die Daba Daa".



Despues a sigui e otorgamento di premio na ganadonan di Premio "Copa Hubenil Gobernador Felipe B. Tromp". E maestro di ceremonia a repasa e biografia di cada nominado. Den categoria Pre-Hubenil e ganado a resulta e hoben Ethan Geerman y categoria Pre-Hubenil Premio Estimulo a resulta e hoben Kailen Wouters. Den categoria Hubenil e ganado a resulta e hoben Braynsly Dirksz y pa categoria Hubenil Premio Estimulo a bay pa e hoben Dalton Conijn.

Pa termina e mainta a invita Su Excelencia Gobernador di Aruba y su distinguido esposa y demas invitadonan pa presencia e desfile nacional na unda a participa Arubaanse Padvindsters Gilde; Scouting Aruba, Grupo Scout San Dominico Noord, Grupo Scout Monseñor Oscar Romero y Sint Hyacinthus; Grupo Scout Casibari Jan Lobbrecht; Grupo Scout Kimball O'hara; Grupo Scout Sint Paulus Michael; Grupo Scout Sonrisa y Grupo Scout Santanero.

Minister Xiomara Maduro ta gradici organisadonan y nos talentonan hubenil pa nan bunita presentacion. Un pabien na e ganadonan di Premio Copa Hubenil Gobernador Felipe B. Tromp y Premio Estimulo. Un biaha mas e mandatario ta expresa palabra di Pabien na nos Rey Willem Alexander y comunidad pa un bunita celebracion Dia di Rey 2024. ■









## A ELABORA RIBA DIFERENTE ASPECTO DI ENSEÑANSA CU STAF DI INTERNATIONAL SCHOOL OF ARUBA



Recientemente, Minister di Enseñansa y Deporte Endy Croes a ricibi bishita di Sra. Rousanne de Weever y Sra. Dalmarie Anderson di International School of Aruba. Durante e reunion a dialoga tocante e program General Education Development (GED), cual ta un alternativa pa e adultonan cu no por a finalisa scol secundario di e forma tradicional.

Tambe, por ofrece hoben bou di 16 y 17 aña bou di cierto circunstancia. GED a desaroya originalmente na aña 1942 como un alternativa util y viabel pa e militarnan cu a wordo manda den exterior pa lucha den guerra prome cu nan a finalisa scol secundario. Manera ta conoci, desde aña 2017, International School of Aruba hunto cu Ministerio di Enseñansa di Aruba a inicia e programa GED, unda ta ofrece esnan cu no a termina scol secundario e alternativa pa finalis'e y haya un diploma. Minister Endy Croes ta indica cu e test aki ta habri porta pa e studiantenan aki por continua cu un estudio na

un Junior College y/of College na Merca of Canada pa sigui desaroya nan mes.

Segun articulo 3, lid 1-d di Landsbesluit, mester haal un score di minimo 165 pa cada materia di GED, sumando un total di 660 punto pa bin den remarke pa Arubalening. Durante e encuentro aki, Sra. de Weever y Sra. Anderson a haci peticion pa reconsidera e score y ahusta esaki. Minister Endy Croes a splica cu esaki ta un trayecto di Landsbesluit, pero cu lo sigui reuni cu nan y cu diferente persona mas den veld pa evalua si tin posibilidad pa reduci e score di 660 pa 640. E mandatario di Enseñansa a pidi nan pa skirbi un carta, treciendo nan argumentonan dilanti. Ademas di esaki, nan a dialoga tocante diferente reto cu International School of Aruba ta pasando aden. Minister Endy Croes a indica cu nan lo keda den contacto cu otro pa busca un solucion pa nan peticion.



# MINISTER ENDY CROES A ENTREGA TROFEO NA EKIPO DI DAKOTA CU A TITULA CAMPEON DI E PROME TORNEO DI XAVIER KING'S DAY YOUTH SOCCER CUP



Riba Dia di Rey, Minister Endy Croes a atende e prome edicion di e torneo di futbol, Xavier King's Day Youth Soccer Cup 2024 organisa pa Xavier University School of Medicine. Un total di diesun (11) club di futbol a participa den categoria U7 y U9. E partidonan di futbol a inicia for di oranan tempran di mainta. Esnan presente sigur a disfruta di un dia yena di bon wega di futbol y diferente actividad, manera dino jump.

Minister Endy Croes tabata presente pa duna sosten y apoyo na nos futbolistanan, alabes a haci entrega di e trofeo na e ekipo di Dakota cu a sali ganado den e categoria di U7. E ekipo di Nacional a conquista e titulo di campeon den categoria U9. Pa conclui, Minister Endy Croes ta felicita y gradici Xavier University School of Medicine y tur esnan cu a haci e torneo aki



posibel y exitoso. Un bunita torneo dedica nan nos hobennan y bon organisa. E mandatario di Deporte ta felicita tur e ekiponan cu a participa y e ganadonan di e prome torneo di Xavier King's Day Youth Soccer Cup 2024.

## BALUARTE DEPORTIVO SR. DEMETRIO "METO" WERLEMAN A RICIBI RECONOCIMIENTO DURANTE PREMIO EXCELENCIA DEN DEPORTE

Diabierna 19 di april 2024, den e prestigioso ballroom di Renaissance Convention Center a tuma luga Premio Excelencia den Deporte 2023, unda a rindi homenahe na dies (10) baluarte deportivo cu a contribui gran parti di nan vida den e desaroyo di deporte di Aruba. Sr. Demetrio Werleman, miho conoci como Meto, a ricibi reconocimiento di Baluarte den Deporte di Prome Minister Evelyn Wever- Croes y Minister Endy Croes.

Sr. Meto ta forma parti di e ekipo di Don Flip Racing. Desde un edad hoben, Sr. Meto su pasion pa drag race a cuminsa. Sr. Meto a conta cu el a haya un motor di auto di drag race regalo y desde e tempo ey e chispa pa drag race a start. Sr. Meto hunto cu su rumannan ta participa activamente den e deporte di drag race tanto na Aruba como na Curaçao. Minister Endy Croes ta gradici Sr. Meto Werleman pa contribui den e



desaroyo di deporte di Aruba y ta felicit'e cu su reconocimiento bon mereci.



# MINISTER ENDY CROES A HACI ENTREGA DI E RECONOCIMIENTO DI BALUARTE CULTURAL NA SR. DANILO VROLIJK Y SR. ROBERT MADURO



Recientemente, durante e di dos edicion di Fiesta Tipico den Bario pa aña 2024 a reconoce dos Baluarte Cultural di e distrito di Paradera pa nan gran aporte y contribucion pa mantene y promove nos musica cultural. Manera ta conoci, na aña 2024, a inicia cu Fiesta Tipico den Bario, un iniciativa cu Ministerio di Cultura ta sostiene. Sr. Danilo Vrolijk y Sr. Robert Maduro a ricibi un bunita homenahe y reconocimiento e anochi aki. Minister Endy Croes a representa colega Minister Xiomara Maduro na e ocasion special aki.

## DANILO VROLIJK

Sr. Danilo "Danchi" Antonio Vrolijk a nace dia 10 di mei 1968 na Aruba. Danchi ta labora na Directie Luchtvaart pa 35 aña. Semper un persona dedica y disciplina na su trabou. Danchi su hobby ta biaha y ta embahador pa e area di Latino America y Caribe di e organisacion World Airline Historical Society. Riba tereno di deporte Danchi ta activo, e ta hungando baseball y softball tanto local- y internacionalmente. Pa loke ta trata musica, Danchi tin un amor enorme pa tur clase di musica, specialmente pa nos musica crioyo. Danchi a milita den diferente grupo musical. El a forma parti den diferente mariachi, manera Lirios del Campo y Luz di Luna. Tur dos como violinista y cantante. Danchi a gana masha hopi festival como cantante tanto na Aruba como den exterior. Danchi a canta y toca cu hopi tipico aki na Aruba, manera Tipico Pegasaya, Los Amigos, Placentero Ritmo y Cuerde y den grupo Alma Folklorico. Desde cu Danchi a siña con pa compone e tabatin exito tras exito. Sr. Robert Maduro tabata must'r'e con ta compone y awe Danchi tin mas cu 535 composicion di su mes. Danchi su bida ta nos dande. El a participa na 26 Festival di Dande den cual e al bira Rey di Dande na aña 2013 y na numeroso ocasion e tabata entre e prome 5 luganan di e festival. Den parti propio composicion Danchi a sa di trece masha hopi composicion ganado tanto infantil, hubenil y adulto. Danchi a yuda inculca nos musica, nos dande den hopi hoben cu awe ta cosechando exito den diferente ramo musical.



## HIGHLIGHTS

Rey di Dande 2013.

5 biaha a sali na di 3 lug, 4 biaha di 2 lug, 3 biaha di 4 lug de Festival di Dande.

Na aña 2013 - nombra pa Minister di Cultura como Compositor di Excelencia.

Na aña 2013 - nombra como Baluarte di Cultura pa Festival un Canto na Himno y Bandera.

Na aña 2017 - nombra pa 'Adopt an Addict' como compositor.

Na aña 2018 - nombra como Baluarte di Dande pa Festival di Dande.

Den nomber di Gobierno di Aruba y Minister Xiomara Maduro, Minister Endy Croes a haci entrega di e reconocimiento di Baluarte Cultural na Sr. Danilo Vrolijk pa su talento como musico, cantante y compositor cu pa mas di 30 aña a mantene nos cultura, tradicion y musica tipico.



## Continuacion MINISTER ENDY CROES A HACI ENTREGA DI E RECONOCIMIENTO....

### ROBERT MADURO

Sr. Robert Frank Maduro a nace na Aruba dia 28 di juni 1967. Robert ta unico yiu di su mayornan. Robert tin tres yiu, di cual 1 ta yiu muhe y 2 ta yiu homber. Robert a studia na scol basico Tarsicius y Dominicus College, despues a continua su estudio secundario na La Salle College Mavo y estudio avansa na MTS Cesar Terzano. Sr. Maduro ta ambtenaar den servicio di gobierno for di aña 1993. Actualmente Robert ta traha na Departamento di Cultura Aruba y ta eherciendo e funcion di coordinador pa cu Organisacionnan Gubernamental y no Gubernamental di Aruba riba e tereno cultural pa gobierno. Robert ta eherce pa varios aña e funcion di locutor. El a cuminsa desde hoben yudando den transmision di diferente evento cu Radio Antiyana y Radio Revolucion. Dia prome di november 2012, Robert ta ser acerca door di Ruben Garcia (den feliz memoria) pa forma parti di e team di locutornan di Power 101.7 FM.

Despues di esey, Robert a realisa algun programa na Canal 90 y awendia Robert ta forma parti di e staf di e Canal 90. Tambe, Robert ta encarga cu e ekipo di transmision di Canal 90 FM cu ta cubri diferente evento, manera Festival di Dande, eventonan di Carnaval, Festivalnan Cultural di Himno y Bandera y mucho mas. Sr. Maduro Robert su interes pa musica a cuminsa for di chikito na Dominicus College tocando cu e frèrenan den klas. Na La Salle College Robert a topa cu dos maestro cu a descubri su talento y a motiv'e pa sigui den musica. Robert su carera musical a cuminsa na La Salle Colege momento cu el a forma un grupo di gaita pa un celebracion di fin di aña na scol. Despues di esaki e ta ser acerca door di su amigo, otro gran musico Sr. Albertico Tico Kelly pa forma parti di Tipico Placentero. Robert a cuminsa den Tipico Placentero como timbalero y despues e grupo a introduci cantamento y aki ta caminda e nomber a cambia pa Placentero Ritmo y Cuerde y asina tambe e exitonan a cuminsa. Placentero Ritmo y Cuerde un agrupacion cu a revolucionar farandula aki na Aruba den añanan 80 y 90, door cu nan tabata hobennan tocando nos musica tipico y folklórico. Aki Robert a descubri otro di su gran talentonan esta, composicion. Robert a cuminsa compone y graba su mesun cancionnan y hunto cu Placentero Ritmo y Cuerde tabata produci y graba cassette, disco y despues cd. Robert a participa na diferente ocasion na Festival di Dande y a sa di conkista e titulo di Rey di Dande na cinco ocasion.

Den Festival di Tumba, Robert a sa di participa na numeroso ocasion na unda el a ser premia diferente ocasion. Tambe, Robert a participa varios biaha na Calypso y Roadmarch Contest na unda el a logra premiacion. Na aña 2000, Robert ta lanta su mesun agrupacion folklórico cu ta Robert y Su Alma Folklórico. Cu e grupo aki Robert a produci mas cu 15 disco compacto, a logra un sin fin di exito y a sa di hiba nos folklore internacionalmente. E bandanan cu Robert a fungi aden como cantante ta entre otro, Tipico Placentero, Placentero Ritmo y Cuerde, The Grasshopper Band, Banda TIGO, BLADE, Robert y su Solo Banda Show, BADU, Alma Folklórico, Alma Next Level, Grupo Cakiña, Limited Edition, Tipico Candela y desde 2020 Robert ta dirigi y forma parti di e agrupacion



Azucar. Robert tin mas cu 42 aña den farandula entreteniendo su pueblo. Como musico Robert a presenta nan diferente pais, manera Curaçao, Boneiro, Sint Maarten, Venezuela, Puerto Rico, Cuba, Hulanda, Alemania y Francia. Den nomber di Gobierno di Aruba, Minister Endy Croes a duna Sr. Robert Maduro e reconocimiento Baluarte Cultural pa su talento como musico, cantante y compositor cu pa mas di 40 aña a mantene nos cultura, tradicion y musica tipico.

Por ultimo, Minister Endy Croes ta felicita Sr. Danilo Vrolijk y Sr. Robert Maduro pa nan contribucion valioso pa mantene y promove nos cultura. Alabes, Minister Endy Croes ta gradici UNOCA pa pone e fondonan disponibel pa por organisa e fiesta tipico cultural den nos barionan. E mandatario di Enseñansa y Deporte ta gradici Fundacion UTR, Union di Tipiconan Rubiano, pa organisa Fiesta Tipico den Bario y colega Minister Xiomara Maduro cu e bunita iniciativa aki pa asina sigui mantene nos cultura di musica tipico bibo. ■■■■





## Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

# 2024

AÑA DI STABILIDAD Y PROSPERIDAD